

27/08/1997

Bank Dunia nafi atur pertemuan PM, Soros

WASHINGTON, Selasa - Bank Dunia menafikan ia mengatur pertemuan khas antara Datuk Seri Dr Mahathir Mohamad dan tokoh kewangan Amerika Syarikat, George Soros di Hong Kong, bulan depan.

Jurucakap Bank Dunia, David Thies, berkata laporan berkaitan pertemuan itu oleh akhbar asing adalah tidak benar.

"Tidak benar kami mengatur pertemuan di antara kedua-dua pihak itu (Dr Mahathir dan Soros). Tiada sebab untuk kami mengatur pertemuan itu," katanya.

Beliau berkata, Tim Cullen, seorang lagi jurucakap Bank Dunia baru-baru ini membuat kenyataan di Hong Kong bahawa 'jika Bank Dunia diminta (untuk mengatur pertemuan itu), kita mungkin berbuat sesuatu'.

Kenyataan itu digembar-gemburkan menjadikannya satu spekulasi oleh pihak akhbar, kata Thies.

Di Kuala Lumpur, semalam, Perdana Menteri berkata: "Saya tidak pernah memberi mandat kepada Bank Dunia untuk mengatur pertemuan itu... Saya tidak tahu apa urusan bagi pihak mereka berkaitan perkara itu, cuba membuat spekulasi seumpama itu."

Dr Mahathir beberapa kali menyalahkan Soros berkaitan krisis mata wang yang berlaku di rantau ini.

Thies berkata, Dr Mahathir dan Soros dijadualkan berucap pada beberapa seminar berkaitan Asia sebelum mesyuarat tahunan Bank Dunia-IMF di Hong Kong.

"Kehadiran mereka adalah secara kebetulan dan ia sudah diatur lama sebelum krisis mata wang yang berlaku di Asia Tenggara itu," kata beliau.

- Bernama

(END)